



Айдемын чонжым да тазалыкшым арала



▼ Анастасия МИХАЙЛОВА

Йошкар-Оласе «Лавель» бренд стилизованный марий вургемым почкалтыш, йытын, кыне куэмла гыч урга. Тудын авторжо – Александра Журова – кажне пашашкыже келге шонымашым пурта.

Коважын тошто ургымо машинаж гыч тўналын

Йошкар-Олаште шочын-кушшо марий ўдыр йочаж го-дымак шке вургем брендым ышташ шонен.

– Эн ончыч эскизым сўретленам. Вара ковамын тошто ургымо машинаж дене, моштыде, тўрлым ургенам. Йонгылыш-влакым ыштен, эркын-эркын шке гыч ургаш тунемынам. 5-ше класс деч вара чыла усталык шонымашем ўрдыжеш коденам. Но 20 ияшем го-дым чонем сўретлаш, ургаш, икманаш, усталык паша деке угыч шупшыш. Кушеч тўналаш, мом ышташ – иканаште умылен шуктен омыл.

Кок ий гыч шканем костюмын эскизшым сўретленам да тудын дене ательеш каенам. Мылам урген пуэныт, но паша келшен огыл. Тунам профессионал семын шке ургаш тунемаш шонен пыште-нам. Юмо деч вургем брендым ышташ польшышым йодынам. Тудо мыйым колын. 25 ияшем го-дым йолташ ўдырем кўлеш оборудованийым мылам пуэн. Мыйым модельер-конструктор Светлана Николаевна Гуськова ургаш туныктен. Пел ий тудын дене вашлийын, шукулан тунемын, ургымо пашаште тўрлў нерген канашен, брендым ышташ тичмашын кўын шуынам. А вара Юмо мый декем икоян шонымашан ен-влакым колтен.

Тыге 26 ияшем го-дым командым погенам. Кызыт тушто шым ен. Пашалан посна помещенийым айленам. Кўлеш арверым утларакшым шке окса дене налынна. Ты-леч посна ургымо оборудованийым налаш кугыжаныш соцконтрактым пуэн, – палдарыш Александра.

Лўмыштат, тамгаштат – келге шонымаш

А.Журован мутшо почеш, брендын лўмжат, логотипшат кўчык жапыште шочыныт.

– «Лавель» «Люди Авелев-



▲ Почкалтыш, йытын, кунетувырым чиен могойлан ласка.



▲ Сўрастарыме ўзгар-влак шкешотан улыт. А.Журован колтымо фото-влак.

цы» манмым ончыкта. Брендын тамгаж нерген ойлаш гын, тудым йолташем дене коктын 15 минутышто ыштенна. Богородичный шўдыр покшелне турня ончыкталтеш. Ты кайык – осал ваштареш кучедалшын символжо. Мыйым лишыл йолташем-влак, фамилием кўчыкемден, Журма-нын ойлат. Садлан брендын лўмжат фамилием: (ЖурАвел) ь гыч эше лектын, манаш лиеш. Пашаштына але икымше ошкылым веле ыштенна, но, шонем, ты ошкыл – пенгыде, – манеш 26 ияш уста ен.

Тукым кыл йомшаш огыл

«Лавель» брендын паша-же ойыртмалтеш. Кызытсе саманлан келшыше улыт, но тыго-дым ожнысо шўлышым шижаш лиеш. Тидыже натуральный куэм-влакым кучылтмылан кўра докан. Александра каласкала:

– Кўлеш чыла материалым палыме поставщик-влак деч веле налаш. Икмыняр йытын куэм-влакым туныктышем пуэн. Почкалтыш, йытын да кыне

Ме вургемым веле огыл ургена. Маша кидмастарна сўрастарыме ўзгар-влакым, марий тамган брелокшамычым ышта. Конешне, могой тудо лийшашым ме пырля шонена. Пытартыш показыштына шукулан «Подкогыль» кулон келшен

куэмла гыч веле вургемым ургена. Мемнан шонымаште, тыгай тувыр веле айдеме капым да чоным арала, эмлаш полша. Ончыкыжым СССР жапысе куэм-влакым кычалаш шонем.

Пашаштына марий тамгам кучылтына. Тидым мый модылан кўра огыл, а чон йодмо почеш ыштем. Мый марий ўдыр улам. Шнуй пале, шинчымаш нерген ятыр ий шымлем да эре ум кычалам. Чыла тиде мыйым марий тўвыраш да йўлаш конден. Лач тунам шкемын марий улмемым да вяян калык улмынам улыленам. Марий кумалтышыш кошташ тўналынам. Мутлан, Акпатыр он, Чумбылат кумалтышлаште лийынам.

Олаште шочшо марий ўдыр улам, а калыкем нерген моткоч чўдын палем. Книга кевытлаште марий-влак нерген материалым кычалынам, но шагал муынам. Вара книгагудылаште марий-влакым куль-

турышт нерген статья-влакым лудынам да улыленам, мый ўрдыжеш кодын ом керт: лудмо шинчымашем илышыш пуртынем, пайдам кондынем. Самырык улам, сандене самырык тукумым марий темылан утларак кумылан ден кертмаш, шонем.

Илыш вашталтеш, ончычсо семын ынде огеш лий. Айдемын вўрыштыжў шочмо генже, шарнымашыже помыжалтыт. Вашке уло тўня шке культуержо деке савырна. Марий калыкат шке йўлажым аралышаш. Сандене «Лавель» брендын тўн шонымашыже ик тургымлан модо огыл, а илыш, могойым ме тудым ужына.

Вургемым айдемын чонжым да тазалыкшым аралаш полшымо шонымаш дене ургена. Тиде стиль веле огыл, тыгак аралтыш. Мемнан кугезе тукумна лач тыге ыштен.

Марий тўрым командьнан чолга енже Ирина Ми-



▲ Александра калыкын культурижым шымла.

халёва ышта. Тылеч посна тўрлў тўрлан келыштаралтше тўрлымў машинкына-влак улыт. Ончыкыжым шке кид дене тўрлаш тунемнена, тидыже марий тўрын ямжым тичмашын почын ончыкташ полша.

Ончыко!

Александра кеч-могой тувырым эн ончыч шкаланже урга да тудым огеш ужале, но йодмо почеш тыгайымак вес енланат урген кертеш.

– Стылым шижмашым мылам пўртўс пуэн, тудо ава, можыч, кугезе тукумым деч куснен. Ушыш толшо шонымашем илышыш вигак пурташ тыршем. Коллекцийым ямдылымаште утларакшым шинчымашем кучылтам. «Лавель» брендын икымше показше «Камелот» рестораныште лийын. Моло показ-влакым «Мо-да» школ эрта-рен. Пытартыш гана показна декабрьште Сейвори Хаус зальште эртен, – каласыш А.Журова.

Декабрьште коллекцийым ончыктымў деч вара «Лавель» бренд нерген интернетлаште ятыр публикаций лийын. Моктымў мут деч посна критикат йонген. Но Александра тидлан ок сыре. «Мый грамотный критикым веле шотыш налаш. Удам возымым вигак мондем. Иктажым ойлымо деч ончыч брендын концепцийым улылыман», – манеш тудо. Лишыл жапыште «Лавель» эше ик показым ончыкта. Кушто да кунам эртымыжым, коллекцийын ойыртмаше нерген але ок ойло. Жапыштыже чыла ужына тугеже.